



## Protocol

**dalla seduta dil cussegl da vischnaunca,  
venderdis, ils 26 da fevrer 2021: allas 20<sup>15</sup> – 22<sup>30</sup>  
Liug: Halla Cons**

---

**Presidi:** Giusep Lozza

**Actuara:** Ursina Murer-Fatzer

**Presents:**

a) Cussegl	Armin Berther Theres Burri Gadola Adrian Deflorin Adrian Flepp Otmar Flepp Armin Manetsch Silvia Bucheli-Caduff	Roland Cajacob Edgar Durschei Mario Flepp Larissa Fry Schuster Helga Probst-Linder Ignaz Venzin
------------	---	--

*Perstgisau* *Martino Sabbadini*

b) Suprastonza communala	René Epp Wendelin Jacomet Paul Flurin Schmidt	Clemens Berther Jris Lombris
-----------------------------	---	---------------------------------

c) Hosps otg

## **Plaid d'avertura dil president**

Cun massa neiv e pauc sulegl ha il schaner mussau a nus puspei tgei potenzial ch'igl unviern ha si cheu tier nus. Las grondas nevadas dils 13 tochen ils 15 da schaner sco era las nevadas dils 27 e 28 da schaner han inagada puspei demussau che la natira ei tuttina aunc pli ferma ch'il carstgaun. Il prighel da lavinias era gronds, gie schizun fetg gronds ch'igl institut per la perscrutaziun da neiv e lavinias "SLF" da Tavau ha classificau il prighel sin scalem 5. Sendas da viagiari, vias lateralas, lingias da tren e schizun las vias cantunalas han stuiu vegnir serradas. In grond engraziament a tuttas e tuts che han segidau e mirau per la segirtad da mintga vischina e vischin. Sulettamein in patratg mudregia mei dapi quels dis. Co savessen nus garantir en da quels muments ina via engiuviars en cass da malsogna ni d'accident? Ei astga buc esser che nus havein buca la pusseivladad da saver carrar cun cass urgents el spital muort che la via resta serrada. La pusseivladad da sgular ei numnadamein era buc adina garantida en temps da malauras. Cheu fuss ei prudent da far entginas ponderaziuns per anflar ina buna e segira sligaziun.

Sch'il coronavirus fuss liquidaus aschi spert sco quei che nos luvriers communalas dostan la neiv en vischnaunca, lu fuss l'entira situaziun gia daditg vargada. Bugen prendel la caschun d'engraziar grondamein a nos luvriers communalas dil menaschi tecnic per lur nunstunclenteivla lavur e grond engaschi en connex cun la rumida da neiv.

Gie, la situaziun cul corona e las mutaziuns da tal metta la vischnaunca, las fatschentas e tuttas vischinas e tuts vischins avon novas sfidas. Lein sperar che la situaziun porti migliur cun la fin fevrer per ch'il Cussegl federal sappi sluccar empau las mesiras severas.

## ***Tscheiver 2021***

Per biars ei il tscheiver il pli bi temps digl onn. Denton muort il corona ha era il tscheiver stuiu ceder. Quei ha la musica da tscheiver "Las Bagordas" tuttina buca vuliu acceptar. Els han giu spert ina bun'idea sin meisa ed han creau ina pintga atmosfera tscheivrila per pign e grond. Ina part dalla casa communalas han ei embelliu cun ina blaha ed ina figura. Cun s'avischinar alla figura han ils visitaders saviu prender in "Sugus" ed el medem mument tedlar musica da tscheiver incl. plievgia da confettis. Tut sut il motto: "In zucher per in sil tscheiver 21".

Las novas uras da parcar han purtau fretg. Ils parcadis sper la Via Acletta eran bein frequentai, denton buca surcargai. Schizun la Via Acletta ei uonn stada da tut temps accessibla per tut il traffic a motor ed a pei.

## **Mortoris**

Dapi la davosa seduta dil cussegl da vischnaunca han ils suandonts vischins bandunau il terreste:

Albin-Flepp Ottilia, naschida ils 19-12-1930, morta ils 24-12-2020

Huonder-Tenner Giuliana, naschida ils 20-11-1927, morta ils 25-12-2020

Deragisch Felix, naschius ils 01-07-1933, morts ils 29-12-2020

Dermon-Deflorin Elisabeth, naschida ils 11-05-1925, morta ils 02-01-2021

Quinter-Riedi Luzia, naschida ils 03-07-1924, morta ils 12-02-2021

Kägi Gottlieb, naschius ils 18-06-1940, morts ils 13-02-2021

## **Naschientschas**

Dapi nossa davosa seduta dil cussegl da vischnaunca ha ei dau quater naschientschas:

Schuster Leif Conradin, naschius ils 10-12-2020, feagl da Larissa Fry Schuster e Tobias Schuster

Lutz Fabio, naschius ils 17-01-2021, feagl da Bianca e Remo Lutz

Steger Lucas Mattiu, naschius ils 27-01-2021, feagl da Hickey Nysa Lisa e Silvio Steger

Deflorin Sven Alexander, naschius ils 17-02-2021, feagl da Daniela ed Adrian Deflorin

**Tractandas:**

1. Protocol 31-2017/2020 e 01-2021/2024
2. Revisiun parziala dalla planisaziun locala: Via da velos da muntogna Gendusas – Caischavedra; Plan general d'avertura / Skillspark al Crest d'Acletta; Plan da zonas e lescha da baghegiar (messadi nr. 1-2021/2024)
3. Cussegl da vischnaunca 2021/2024 – Finamiras e program: Orientaziun (messadi nr. 2-2021/2024)
4. Cumissiun per optimar l'organisaziun communal: Nominaziun da quater cusseglier(a)s (messadi nr. 3-2021/2024)
5. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér  
Il president: L'actuara:

Giusep Lozza

Ursina Murer-Fatzer



Cussegl da vischnaunca 2021/2024  
Protocol nr. 2  
Seduta dils 26 da fevrer 2021

---

## 1. Protocols 31-2017/2020 e 01-2021/2024

**Decisiun:**

***Ils protocols vegnan approvai unanimamein.***

Cussegl da vischnaunca Disentis/Mustér  
Il president: L'actuara:

Giusep Lozza

Ursina Murer-Fatzer



## **2. Revisiun parziala dalla planisaziun locala: Via da velos da muntogna Gendusas – Caischavedra; Plan general d'avertura/Skillspark al Crest d'Acletta; Plan da zonas e lescha da baghegiar (messadi nr. 1-2021/2024)**

Suprastonza:

President communal René Epp:

Cun ina visualisaziun vegn la fatschenta presentada. Il messadi consista ord duas impurtontas parts; la senda da velos da muntogna (*Biketrial/Flowtrail*) da Gendusas – Caischavedra ed il Skillspark a Sax Su.

Igl investur Weber ei per la vischnaunca da Mustér da gronda impurtonza. El ha gia realisau differents projects en vischnaunca sco; Catrina Resort, stabiliments da neiv, colligiazion dil territori da skis Salins-Cuolm da Vi-Caischavedra ed ulteriurs projects ein aunc sin rucca.

### ***Senda da velos da muntogna***

Ils 19 da december 2019 ha la Catrina Resort AG inoltrau la damonda da baghegiar. Sin fundament dall'exposiziun publica ei ina protesta vegnida inoltrada. Quella ei pli tard vegnida retratga. Ils 6 da mars 2020 ha igl uffeci pil svilup dil territori (*ARE*) pretendiu il project per il plan general d'avertura che basegna cheutras ina revisiun parziala dalla planisaziun locala. Plinavon ha igl uffeci pretendiu da renviar la damonda da baghegiar. Sin fundament da quella comunicaziun ha la suprastonza communal instradau il project per il plan general d'avertura e decidiu da sistir la damonda da baghegiar.

Ils 6 da november entochen ils 7 da december 2020 ha l'exposiziun da cooperaziun giu liug. En connex cun l'exposiziun ei vegniu inoltrau dus giavischs. Las organisaziuns d'ambient han giavischau in concept per la protecziun dallas palius. Il giavisch dil petent privat era da midar il trassé. Quei giavisch ha denton buca saviu vegnir risguardaus muort il conflict dil dretg federal davart la protecziun dallas palius.

L'exposiziun da recuors succeda naven dils 5 da mars entochen ils 5 d'avrel 2021. Sch'ei vegn inoltrau negins recuors sa la procedura da baghegiar cuntinuar. La finamira ei che la Regenza sa approbar il project la stad 2021. Silsuenter sa la senda da velos vegnir realisada.

### ***Skillspark a Sax Su***

Ils responsabels comunals ein parti dil fatg che quella damonda da baghegiar sappi vegnir tractada e lubida en fuorma d'in "BAB" per baghetgs ordeifer la zona da baghegiar. Igl uffeci d'agricultura e geoinformaziun ha mess en damonda la conformitad dalla zona agricola cul project previu. Cheutras ha igl uffeci pil svilup dil territori communicau che la zona stoppi vegnir conforma. Sin fundament da quei scriver ha l'elaboraziun dil plan da zonas stuiu vegnir instradada. En quei interval aveva igl investur Weber gia mess en moviment la realisaziun dil Skillspark e gia fixau il termin per l'inauguraziun cun il renomau biker Nino Schurter. La suprastonza communal ha tolerau quei agir ed ha el medem mument instradau la revisiun parziala dalla planisaziun locala. L'exposiziun da cooperaziun ha giu liug dils 4 da matg entochen ils 3 da zercladur 2020. Igl ei vegniu inoltrau in giavisch da construir ina seiv per liung dalla zona per indrezs da sport e temps liber al Crest d'Acletta. Quei fatg vegn tractaus el rom dalla lubientscha da baghegiar.

Il cussegl da vischnaunca ha d'approbar la revisiun parziala dil plan da zonas dalla lescha da baghegiar. La revisiun dil plan da zonas e dalla lescha da baghegiar ei da sutametter

alla votaziun all'urna ch'ei previda el 2021. Igl october 2021 ei previu l'exposiziun da recuors. Silsunter sa l'approbaziun formala entras la Regenza grischuna succeder.

Il Skillspark ei ina purschida turistica impurtonta. Igl ei da porscher maun agl investur en ses projects sco era da scaffir la basa legala persunter.

Sco davos punct informativ el messadi ei vegniu menziunau igl artechel energetic. La finamira ei d'adattar igl artechel 74 dalla lescha da baghegiar communal. Quei artechel duei el futur porscher ina buna basa legala per era saver agir en connex cun implonts d'energia. Igl october 2020 han ins inoltrau la revisiun parziala dalla lescha da baghegiar en connex cun igl artechel energetic per preexaminaziun. Ils emprems resultats spetgan ins la primavera 2021. Silsunter succeda l'exposiziun da cooperaziun che cuoza 30 dis. El cussegl eis ei previu da presentar la fatschenta ils 25 da zercladur 2021. La votaziun all'urna ei previda il settember 2021.

L'approbaziun entras la Regenza grischuna succeda igl unviern 2021/2022.

### **Discussiun:**

Il cussegl giavischa cuort in'explicaziun davart la differenza denter la planisaziun locala ed il plan general d'avertura.

President communal René Epp repeta cuort il proceder en causa.

Il cussegl ei satisfatgs dalla risposta.

### **Decisiun:**

#### ***Il cussegl decida unanimamein***

- 1. d'approbar la revisiun parziala dalla planisaziun locala – plan general d'avertura "Via da velos da muntogna Gendusas – Caischavedra" cun suttametter il project alla procedura da recuors per l'approbaziun entras la Regenza grischuna;***
- 2. d'approbar la revisiun parziala dalla planisaziun locala Skillspark, dil plan da zonas e dalla lescha da baghegiar cun suttametter quei conclus alla votaziun all'urna e silsunter alla procedura da recuors per l'approbaziun entras la Regenza grischuna.***

Cussegl da vischnaunca Disentis/Mustér  
Il president: L'actuara:

Giusep Lozza

Ursina Murer-Fatzer



### 3. Cussegl da vischnaunca 2021/2024 – Finamiras e program: Orientaziun (messadi nr. 2-2021/2024)

Suprastonza:

President communal René Epp:

Il president explichescha cuort las finamiras ed il program. Las finamiras generalas secloman; luvrar pil beinstar general, crear in bien image e surtut rinforzar ina buna communicaziun anoviars. Tuts duein trer vid il medem sughet e crear trasparenza. Nies motto "Mustér – viver attractiv". Plinavon eis ei impurtont da promover il svilup economic e rinforzar il commerci e l'industria. Las finanzas ston restar bunas denton era porscher la libertad per saver promover in bien svilup. Per in bien svilup drova ei era las resursas necessarias e professiunalas. Medemamein ein era bunas sendas, colligiazions a pei sco era pil traffic plaun (*velos, famiglias etc.*) da gronda impurtonza. Mintga departament ha francau sias finamiras el plan dils proxims onns. La suprastonza communal ha plinavon creau il program annual pil cussegl da vischnaunca 2021/2024.

#### **Discussiun:**

*Departament "administraziun, finanzas, economia"*

Cussegliaer Edgar Durschei:

Daco anflan ins buca en la survesta dallas finamiras il project Acla da Fontauna?

Mobilisar zonas specialas per hotels ei da perseguitar precautamein. Buca ch'ins crescha grevadetgnas enstagl d'avantatgs en quella tematica p.ex. saver nezegiar entuorn hotels.

President communal René Epp:

Sut la sparta commerci ed industria han ins il focus da reactivar il Hotel Disentiserhof, igl Acla da Fontauna etc. La suprastonza actuala vegn a risguardar las analisas d'antruras.

*Departament "sanadad, scolaziun, cultura e sport"*

Cussegliaera Larissa Fry Schuster:

Con spert san ins quintar cun la realisaziun d'in subcenter pil survetsch medicinal en vesta dils miedis da casa che van plaunet en pensiun, la basa d'ambulanza etc.?

President communal René Epp:

La Cadi persequitescha da crear in subcenter medicinal cun porscher el Center da sanadad Puntreis; ina pratica da miedis, ina basa d'ambulanza sco l'integraziun dalla Spitex. La Sana Surselva planisescha sia strategia sin palancau regional. In plan concret da lezza vart ei da spitgar en dus fin treis onns.

*Departament "ambient e segirtad"*

Cussegliaer Edgar Durschei:

Ella davosa perioda d'uffeci ei vegniu menziunau pliras gadas che la capacid dalla serenera actuala seigi sufficienta. Ei il project "serenera" veramein necessariis d'instradar el proxim temps?

President communal René Epp:

Igl ei correct che la serenera ha actualmeins avunda capacid. Cun in'eventuala reactivaziun dil Hotel Disentiserhof, il Hotel Acla da Fontauna, il Catrina Resort vegn la serenera cunzun duront il temps dalla sesiun aulta a siu cunfin. La suprastonza

communala ha la finamira d'analysar danovamein la situaziun actuala dalla serenera e da perseguitar a temps la sanaziun ed igl engrondiment.

Gerau Paul Flurin:

Dapi l'existenza dalla serenera eis ei vegniu sanau toc per toc. In fatg problematic ei cunzun era che la furniziun da material per eventualas reparaturas ni remplazzaments vid ils indrez dalla serenera sa prest buca pli vegnir garantius. La vischnaunca vegn buca d'untgir la sanaziun che preveda cuosts da rodund 4 milliuns francs e quei els proxims 5-6 onns. Ils cuosts per in eventual engrondiment dalla serenera sespleigan tier rodund 1 milliun francs.

*Program previu dil cussegl da vischnaunca 2021*

Cussegl:

In grond compliment alla suprastanza comunala per il bien e structurau program da lavur cun claras finamiras. Cheutras ein cusseglieras e cussegliers ordavon bein informai davart las fatschentas previdas.

Cusseglia Armin Berther:

Tier il cussegl dils 2 d'avrel 2021 vegn menziunau in eventual credit per las pendicularas. Da tgei credit setracta ei cheu? Tgei purschidas preveda la carta da hosps la stad 2021?

President communal René Epp:

Oz, ils 26 da fevrer 2021 ein ils responsabels dallas vischnauncas dad Andermatt, Sedrun, Mustér incl. ils representants dallas pendicularas Mustér e Skiarena Andermatt-Sedrun s'entupai ad Andermatt per discutir igl avegnir dalla carta da hosps. Quella carta vegn a custar allas vischnauncas dapli. En quei connex vegn ei ad haver liug la fin mars/entschatta avrel 2021 in cussegl extraordinari ensemen cun il cussegl da vischnaunca da Tujetsch.

2020 pertuccava il credit specificamein las Pendicularas Mustér. Ussa han ins denton instradau ina nova via cun ina slihaziun regiunala e la finamira da midar la lescha da turissem. Pil mument ein las purschidas per la stad 2021 aunc buc enconuschentas.

**Decisiun:**

***Il cussegl pren enconuschientscha dallas finamiras e dil program dil cussegl da vischnaunca 2021/2024.***

Cussegl da vischnaunca Disentis/Mustér  
Il president: L'actuara:

Giusep Lozza

Ursina Murer-Fatzer





#### **4. Cumissiun per optimar l'organisaziun communal: Nominaziun da quater cusseglier(a)s (messadi nr. 2-2021/2024)**

Suprastonza:

President communal René Epp:

Ina dallas finamiras ei dad esser cumpetitivs e garantir in bien svilup en vischnaunca. En vischnaunca vulan plirs projects vegnir realisai. Tut projects che basegnan dabia resursas e temps da sviluppar e d'elavurar ora (*planisaziun locala, center dil vitg, crear ed optimar las sendas, crear ina gassetta, serenera, pendicularas, project avertura dalla via forestala etc.*). Per saver sviluppar nosa vischnaunca ston las structurass vertentas vegnir surluvradas ed analisadas da rudien (*process da lavur, adattaziun dils differents regulativs e reglaments*). En quei process vegn medemamein analisau las cumpetenzas finanzialas e las responsabladas dalla suprastonza communal e dalla direzziun. Plinavon vegn surluvrau il plan da plazzas, igl uorden da cumpetenzas, ils survetschs generals (*spurtegl, telefon*) ed analisau il baghetg communal.

La suprastonza communal prepara per mauns dalla cumissiun in messadi cun sias propostas sco era propostas per la revisiun dils regulativs per il personal communal e d'indemnisaziun che cumpeta al cussegl da vischnaunca. La cumissiun tracta il messadi che la suprastonza communal surdat ad ella. Cun quei agir less la suprastonza communal demussar dapli trasparenza e luvrar naven dall'entschatta ensemen cun il cussegl da vischnaunca. Debattar e discussiunar san ins il meglier en ina cumissiun. La cumissiun sa allura far propostas per adattaziuns ni ulteriuras propostas per mauns dalla suprastonza communal. Igl ei bein pusseivel ch'il cussegl da vischnaunca ha da tractar duas entochen treis propostas en caussa. La fatschenta vegn tractada prevedentamein el cussegl dils 25 da zercladur 2021.

#### **Debatta d'entrada**

Cusseglia Larissa Fry Schuster:

Tenor explicaziuns elavura la suprastonza communal in messadi e cheutras sia proposta per mauns dalla cumissiun. Co sa la cumissiun ord commembers(-ras) dil cussegl da vischnaunca analisar correct ed objectiv la lavur dalla suprastonza communal? Retscheiva la cumissiun investa els detagls ord ils discuers da personal, resultats etc.? Plinavon fuss ei da beneventar d'integrar en quella cumissiun personas externas e dil fatg? Tgei ei il motiv che las structurass ein pil mument buc optimalas?

President communal René Epp:

Ord il messadi retscheiva la cumissiun ils inputs necessaris per sia lavur. Sche la cumissiun basegna ulteriuras informaziuns en detagl vegnan quellass era messas a disposiziun. In'analisa externa cun ina vasta documentaziun ei gia avon maun ord il project "Pesentincla". La suprastonza communal ei denton dil meini ch'ei basegna buc personas externas per mussar co ei ha da funcziunar en nosa vischnaunca. Nus sezs savein tgei ch'ei drova. Nus duvrein bunas structurass e premissas optimalas sco era flexiblas. Ei sto vegnir analisau da rudien sche las resursas dad oz tonschan per tut nos projects/nies program da lavur.

Cusseglia Edgar Durschei:

Pér gest ils 21 d'uost 2020 ha il cussegl renvieu il tractament dil regulativ d'indemnisaziun. Ei fa surstar ch'ins vul gia ils 25 da zercladur 2021 puspei tractar in niev regulativ. Igl ei impurtont da simplificar process da lavur per evitar eventuala lavur dubla e buc en emprema lingia da perseguitar in alzament da plazzas. Nosa vischnaunca ha

medemamein la finamira da vegnir pli attractiva pil pagataglia. Sa ed ei quei in summa la cumpetenzza ed il pensum dil cussegl da vischnaunca da far ina tala analisa en quei cuort temps? Interpresas en general engaschan per ordinari persunas dil fatg. In tal process che empermetta optimal resultats da restructuraziun basegna dus entochen treis onns e sa buca vegnir exequius a cuorta vesta.

President communal René Epp:

La finamira primara ei buca in alzament da plazzas. L'administraziun communal sto absolut buca esser gronda denton buna e professionala. Daco il cussegl da vischnaunca? Il cussegl ei la davosa istanza che reveda ils regulativs. Per quei motiv ei il giavisch da luvrar naven dall'entschatta enneu cun il cussegl per garantir trasparenza. La suprastanza communal less ina survesta cumplessiva sur tut las spartas. Igl ei uras da surluvrar tut ils reglaments en caussa structuradas. Finamira ei da contonscher dapli flexibilitad en l'entira organisaziun. Buc d'emblidar, nossa vischnaunca drova avunda glied dil fatg per accelerar las lavurs administrativas e per saver sesviluppar en l'endretga direcziun. La decisiun finala ha il cussegl da vischnaunca, lez muossa la direcziun finala co tut duei sesplegar el futur.

Cussegliaer Roland Cajacob:

Tgei schabegia sch'il cussegl entra oz buca en la fatschenta? Vegn il cussegl allura confruntaus directamein el cussegl dil zercladur cun ina proposta dalla suprastanza communal?

President communal René Epp:

La suprastanza communal vegn ad elaborar il messadi cun ni senza la cumissiun ord il miez dil cussegl. Per esser dall'enschatta enneu transparents enviars il cussegl beneventa la suprastanza communal da cuntinuar il viadi comunablamein cun ina buna basa.

### **Discussiun:**

Cussegliaer Edgar Durschei:

Cunterfa quei agir buca al regulativ da fatschentas, cun quei ch'igl ei vegniu presentau avon cuort ina midada dil regulativ q.v.d eis ei buca memia bauld da tractar tala?

President communal René Epp:

Igl ei plitost in usit da buca presentar fatschentas renviadas dacuort en in interval d'in onn. Ina stipulaziun uffiziala en quei senn exista en negins reglaments. La cumpetenzza da dar suatientscha alla fatschenta ni buca cumpeta cumpleinamein al cussegl da vischnaunca.

*Il president dil cussegl da vischnaunca Giusep Lozza prelegia las persunas proponidas per la cumissiun per optimar l'organisaziun communal, numnadamein;*

- cussegliera Theres Burri Gadola
- cussegliera Mario Flepp
- cussegliera Armin Manetsch
- cussegliera Helga Probst-Linder

Cussegliaer Edgar Durschei propona ultra dallas persunas numnadas, cussegliera Adrian Flepp sco candidat per la cumissiun. Cussegliaer Adrian Flepp posseda la scolaziun adequata per saver giudicar ed analizar la situaziun actuala e futura. Plinavon propona el d'integrar in commember dalla cumissiun da gestiun en quella cumissiun.

President communal René Epp:

La cumissiun da gestiun ei buca in gremi politic e cheutras vegnan commembers ord quella cumissiun buca en damonda per la cumissiun per optimar l'organisaziun communal. En concordanza cun il president dalla cumissiun da gestiun vegnan els involvi el process da lavur preparativa, quei buca sco davos per haver la survigilanza dils regulativs.

*Suenter ina cuorta discussiun seretila cusseglier Mario Flepp sco candidat e cusseglier Adrian Flepp accepta la nominaziun per la cumissiun per optimar l'organisaziun communal.*

**Decisiun:**

***Il cussegl nominescha unanimamein***

- 1. cussegliaera Theres Burri Gadola, cusseglier Adrian Flepp, cusseglier Armin Manetsch e cussegliaera Helga Probst-Linder en la cumissiun per "optimar l'organisaziun communal" per mauns dall'elecziun entras la suprastanza communal.***

Cussegl da vischnaunca Disentis/Mustér  
Il president: L'actuara:

Giusep Lozza

Ursina Murer-Fatzer



## 5. Ura da damondas (conform ad art. 44 dil regulativ da fatschentas)

Igl ei vegniu inoltrau neginas damondas a scret.

*Damondas che san vegnir rispundidas a moda sempl:*

Cusseglia Ignaz Venzin:

Igl ei buca mo impurtont da crear in bien image, mobein da mantener igl image avon maun. Il survetsch che l'administraziun communal porscha ei fetg impurtonts e vegn buc mess en damonda. Tiel messadi Skillspark a Sax Su ston ins constatar che quel ei vegnius realisau senza concept e lubientscha da baghegiar. Ins sto partir dil fatg che la suprastanza communal ha concediu ina lubientscha tenor saun giudezi. Co vesa quei ora per damondas da baghegiar el futur? Sa in e scadin parter dil fatg anora che las lubientschas da baghegiar vegnan concedidas tenor saun giudezi ni vegn leu observau en detagl mintga artechel ord la lescha da baghegiar?

Gerard Wendelin Jacomet:

Sper la lescha da baghegiar communal ein era las leschas surordinadas da suandar. Pil Skillspark ha la suprastanza communal buca concediu ina lubientscha. Igl investur Weber ha realisau il project en atgna reschia cun la resca da restructuraziun dil Skillspark sin agen cuost e cun tuttas consequenzas ligiontas el cass.

Cusseglia Edgar Durschei:

Preveda la vischnaunca Disentis/Mustér in sustegn finanziel en favur dall'economia indigena en connex cun il coronavirus sco nos vischins tuatschins?

President communal René Epp:

La suprastanza communal vegn buc a perseguitar la direcziun da Tujetsch. La vischnaunca da Tujetsch conceda quei sustegn finanziel ensemen cun l'Energia Alpina. Ultra da quei metta il cantun Grischun in'ulteriura gada a disposiziun dapli mieds finansials per la hotellaria. La suprastanza communal ha medemamein retschert a scret damondas da sustegn concretas. Il tractament da quellas damondas vegn a succeder igl avrel 2021.

### Informaziuns:

President communal René Epp:

Il proxim cussegl da vischnaunca ha liug ils 30 d'avrel 2021. A cuorta vesta vegn organisau aunc in cussegl comunabel cun Tujetsch en connex cun la lescha da turissem. Quei duei succeder la fin mars/entschatta avrel 2021. Il cussegl da vischnaunca vegn orientaus e documentaus a temps. Ils 28 da matg 2021 ha la seduta extraordinaria dil cussegl da vischnaunca liug.

Gerau Clemens Berther:

En connex cun in eventual sviament Mustér – Sumvitg sco era in sistem d'alarm per segirar la Val Sogn Placi e la Stalusa, ha il Cussegl grond approbau ina part dall'incumbensa da Clemens Berther (*14 da zercladur 2018 a Puntraschigna*). Il Cussegl grond sustegn la migliur da segirar la Val Sogn Placi e la Stalusa en connex cun lavinas e sbuaus e cheutras per evitar la serrada dalla via cantunala. Ils responsabels dil cantun ein lundervi d'examinar la situaziun e da lantschar la procedura adequata. La part pil sviament dalla via cantunala a Mustér ei buca vgnida acceptada.

Cussegl da vischnaunca Disentis/Mustér  
Il president: L'actuara:

Giusep Lozza

Ursina Murer-Fatzer

Disentis/Mustér, ils 27 da fevrer 2021